



Broj: 02-05-19435-4/11
Sarajevo, 09.06.2011. godine

Na osnovu čl. 22. i 24. stav 4. Zakona o Vladi Kantona Sarajevo ("Službene novine Kantona Sarajevo", broj: 24/03 - Prečišćeni tekst), Vlada Kantona Sarajevo, na **21.** sjednici održanoj **09.06.2011.** godine, donijela je sljedeći

Z A K L J U Č A K

1. Utvrđuje se Prijedlog zaključka o prihvatanju Rezolucije Evropskog parlamenta o Srebrenici u izvornom obliku.
2. Predlaže se Skupštini Kantona Sarajevo da, u skladu sa Poslovnikom Skupštine Kantona Sarajevo, doneše zaključak iz tačke 1. ovog Zaključka.
3. Sastavni dio ovog Zaključka je izvorni tekst Rezolucije Evropskog parlamenta o Srebrenici.

P R E M I J E R

Fikret Musić

Dostaviti:

1. Predsjedavajuća Skupštine Kantona Sarajevo
2. Skupština Kantona Sarajevo
3. Premijer Kantona Sarajevo
4. Kabinet premijera Kantona Sarajevo
5. Evidencija
6. Arhiva



web: <http://vlada.ks.gov.ba>
e-mail: premijer@ks.gov.ba;
Tel: + 387 (0) 33 562-068, 562-070
Fax: + 387 (0) 33 562-211
Sarajevo, Reisa Džemaludina Čauševića 1



Na osnovu člana 18. Ustava Kantona Sarajevo ("Službene novine Kantona Sarajevo" br. 1/96, 2/96, 3/96, 16/97, 14/00, 04/01 i 28/04), Skupština Kantona Sarajevo, na sjednici održanoj ____ 2011. godine, donijela je

PRIJEDLOG

**ZAKLJUČAK
O PRIHVATANJU REZOLUCIJE EVROPKSOG PARLAMENTA O
SREBRENICI**

1. Prihvata se tekst Rezolucije Evropskog parlamenta o Srebrenici.
2. Sastavni dio ovog zaključka je tekst Rezolucije Evropskog parlamenta o Srebrenici.
3. Ovaj zaključak stupa na snagu danom objavljivanja u "Službenim novinama Kantona Sarajevo".

Broj:

Datum:

Predsjedavajuća
Skupštine Kantona Sarajevo
Prof. dr. Mirjana Malić

OBRAZLOŽENJE

PRAVNI OSNOV

Pravni osnov za donošenje Zaključka sadržan je u odredbama člana 22. i 24. stav 4. Zakona o Vladi Kantona Sarajevo („Službene novine Kantona Sarajevo“, broj: 24/03 - Prečišćeni tekst), kojim je utvrđeno da Vlada Kantona Sarajevo, u okviru svojih nadležnosti utvrđenih Ustavom Kantona, donosi: uredbe, odluke, rješenja i zaključke.

RAZLOZI DONOŠENJA

Dana 15. januara 2009. godine Evropski parlament je izglasao Rezoluciju o Srebrenici kojom se 11. juli proglašava evropskim Danom sjećanja na žrtve masakra u Srebrenici; pozivaju se države članice EU i države zapadnog Balkana da obilježe taj datum kao Dan sjećanja na genocid u Srebrenici.

Srebrenica je, Rezolucijom Vijeća sigurnosti UN od 16. aprila 1993. godine dobila status zaštićene zone, te već sam ulazak u Srebrenicu oružanih snaga predstavlja direktno kršenje Odluke Vijeća sigurnosti UN, dok je počinjeni genocid najveći zločin počinjen u Evropi od Drugog svjetskog rata do danas (preko 8.000 žrtava).

Usvajanje teksta Rezolucije je ujedno i uvjerenje da je objektivno suočavanje sa prošlošću i jedan od najbitnijih preduslova za utemeljenje dugoročnog mira, odnosno mirnije i prosperitetnije budućnosti. Samo ukoliko se sjećanje na prošlost utemelji na činjenicama, a ne na mitskim pričama, moguće je postići sprečavanja iracionalnih ideologija i zlodjela koje one produkuju.

U Rezoluciji, koju su zajedno predložile sve političke grupacije u Evropskom parlamentu, naglašeno je da se potrebno podsjetiti i prikladno pokloniti svim žrtvama zločina, koje su stradale za vrijeme ratova na Balkanu.

Predlagač teksta Rezolucije, gosp. Jelko Kacin, je na kraju svog obrazloženja istakao: "Ova rezolucija nije namijenjena prošlosti. Iako govori i o mrtvima, namijenjena je živima i njihovoj boljoj budućnosti".

Tekst rezolucije o Srebrenici

Rezolucija Evropskog parlamenta o Srebrenici

Evropski parlament,

- poštajući svoju rezoluciju od 7. jula 2005. "Balkan: 10 godina nakon Srebrenice",
- poštajući Sporazum o stabilizaciji i pridruživanju između Evropske unije i Bosne i Hercegovine potpisanih 16. juna 2008. i preporuke o članstvu u Evropskoj uniji date svim zemljama zapadnog Balkana na samitu Evropske unije u Solunu 2003. godine,
- poštajući Pravilo 103(4) svojih Pravila o postupku;

A. budući da je 11. jula 1995. bosanski grad Srebrenica, koja je u to vrijeme bila izolirana enklava koju je Vijeće sigurnosti UN proglašilo sigurnom zonom svojom odlukom donesenom 16. aprila 1993., pala u ruke snaga srpskih militanata koje je predvodio general Ratko Mladić a pod komandom tadašnjeg predsjednika Republike Srpske Radovana Karadžića;

B. budući da su u roku od nekoliko dana krvoproljeća nakon pada Srebrenice snage bosanskih Srba, kojima je zapovijedao general Ratko Mladić i paravojne jedinice, uključujući srbijske neredovite policijske jedinice koje su ušle u bosanski prostor iz Srbije, skupno smaknule više od 8000 muslimanskih muškaraca i dječaka, koji su tražili sigurnost na ovom području pod zaštitom Mirovnih snaga Ujedinjenih nacija (UNPROFOR); budući da je na silu deportovano skoro 25 000 žena, djece i starijih osoba, čineći ovaj događaj najvećim ratnim zločinom u Evropi od kraja Drugog svjetskog rata;

C. budući da se ova tragedija, koju je Međunarodni krivični sud za bivšu Jugoslaviju (MKSJ) proglašio činom genocida, odvijala na mjestu koje su Ujedinjene nacije (UN) proglašile sigurnom zonom, zbog čega je ona simbol nesposobnosti međunarodne zajednice da intervenira u sukobima i zaštiti civilno stanovništvo;

D. uzimajući u obzir višestruka kršenja Ženevske konvencije koja su počinili vojnici bosanskih Srba nad civilnim stanovništvom Srebrenice, uključujući protjerivanje hiljada žena, djece i staraca kao i silovanje velikog broja žena;

E. budući da uprkos ogromnim naporima učinjenim do današnjeg dana da se otkriju i iskopaju masovne i pojedinačne grobnice te identificiraju tijela žrtava, do sada izvedena istraživanja ne dozvoljavaju potpunu rekonstrukciju događaja u Srebrenici i oko nje;

F. budući da nema stvarnog mira bez pravde, te budući da puna i bezuvjetna saradnja sa Međunarodnim krivičnim sudom za bivšu Jugoslaviju ostaje osnovni zahtjev za zemlje zapadnog Balkana za budući nastavak procesa integracije u Evropsku uniju;

G. budući da je general Radislav Krstić kao pripadnik vojske bosanskih Srba prva osoba koju je Međunarodni krivični sud za bivšu Jugoslaviju (proglašio krivom zbog pomaganja i poticanja srebreničkog genocida, budući da je jedan od dvojice najistaknutijih optuženika Ratko Mladić još uvijek na slobodi skoro četrnaest godina nakon tragičnog zbijanja, i budući

da je pozdravljen to što je Radovan Karadžić prebačen u Međunarodni krivični sud za bivšu Jugoslaviju;

H. budući da je institucionalizacija dana sjećanja najbolji način odavanja poštovanja žrtvama zločina i slanje jasne poruke budućim generacijama,

1. Evropski parlament se sjeća i odaje počast svim žrtvama okrutnosti tokom rata u bivšoj Jugoslaviji; izražava svoje saučešće i solidarnost sa porodicama žrtava, od kojih mnoge žive bez konačne potvrde o sudbini njihovih očeva, sinova, muževa ili braće, priznaje da je ovaj nastavak bola pogoršan propustom da se privedu pravdi odgovorni za ove događaje;

2. Poziva Vijeće i Komisiju da prikladno odaju počast godišnjici čina genocida Srebrenica – Potočari podržavajući priznanje Evropskog parlamenta o 11. julu kao Danu sjećanja na srebrenički genocid u cijeloj Evropskoj uniji i poziva sve zemlje zapadnog Balkana da učine isto;

3. Poziva na dalje napore za privođenje pravdi ostalih bjegunaca, izražava svoju punu podršku važnom i napornom radu Međunarodnom krivičnom судu za bivšu Jugoslaviju (i naglašava da je privođenje pravdi za zločine u i oko Srebrenice još jedan važan korak prema miru i stabilnosti u regionu;

4. Naglašava važnost pomirenja kao dijela evropskog integracionog procesa, ističe važnu ulogu religijskih zajednica, medija i obrazovnog sistema u ovom procesu, tako da stanovništvo svih etničkih grupa može prevazići tenzije prošlosti i početi miroljubiv i iskren suživot u zajedničkom trajnom miru, stabilnosti i ekonomskom razvoju, podstiče sve zemlje da učine dalje napore i dođu do dobrih odnosa unatoč teškoj i opterećavajućoj prošlosti;

5. Nalaže svom predsjedniku da proslijedi ovu rezoluciju Vijeću, Komisiji, vladama država članica, Vladi i Parlamentu Bosne i Hercegovine, njenim entitetima i regionalnim jedinicama i vladama i parlamentima država zapadnog Balkana.